

摘藻堂四庫全書薈要

集部

欽定四庫全書薈要

御定歷代題畫詩類卷八十二目錄

蘭竹類

題東坡竹石

宋黃庭堅二首

贈趙太虛畫竹石

宋白玉蟾

陳德元竹石

元元好問二首

子昂為閑閑畫竹石作別

元程鉅夫

畫竹石

元虞集二首

題高公畫竹石

元黃潛

題高尚書竹石

元楊載

畫竹石

元楊載

張月梅子昂竹石圖歌

元范梈

題伯庸所藏子昂竹石

元袁桷二首

王本中醉作竹石壁上

元薩都拉

題竹石圖

元陳旅

柯氏山雲竹石圖

元陳旅

題熊雲巢竹石圖 元陳旅

題王氏竹石圖 元陳旅

小竹石圖 元吳師道

題高彥敬尚書竹石圖 元柳貫

題謝仲和竹石 元郝韶

題分宜趙尹所藏子昂竹石圖 元歐陽玄

題松雪竹石 元李孝光

子昂竹石 元劉永之

雲林畫竹石

元華幼武

顧定之竹石

元張雨

題前人竹石嘉樹圖

元丁鶴年

題竹石圖

元張天英

題王黃鶴竹石便面

元陶宗儀

題綠竹蒼石圖

元陶宗儀

題柯敬仲石竹

元唐肅

管夫人竹石

明朱應宸

管夫人竹石

明丁明

管夫人竹石

明朱損

管夫人竹石

明鄭元

松雪畫竹石圖

明盧熊

松雪畫竹石圖

明秦約

松雪畫竹石圖

明張適

松雪畫竹石圖

明許性

子昂竹石

明金幼孜

題倪雲林竹石

明高遜志

雲林畫竹樹秀石

元饒介

雲林畫竹樹秀石

明于思緝三首

雲林畫竹樹秀石

明陳允明

雲林畫竹樹秀石

明余銓

題竹石小畫

明程本立

許秋官壁間竹石

明陳墀

竹石圖

明史傑

為人題竹石

明王世懋

與達甫燕坐小齋為寫竹石

明文徵明

泉石脩篁圖

明林瀚

題張端衡竹木石畫

宋劉宰

題朱邸竹木

元虞集二首

柯敬仲畫古木疎篁

元虞集

竹樹圖

元楊載

題竹樹圖

元范梈

題枯木竹畫

元李祁

鄭子聲竹樹圖

元黃鎮成

題李遵道畫竹木圖

元薩都拉

題張藻仲竹木

元戴良

商德符李遵道共畫竹樹

元丁復

題柯敬仲竹木

元楊維禎

題竹樹圖

元倪瓚二首

為蹇原道題竹木圖

元倪瓚

商德符李遵道共畫竹樹

元張雨

題海寧吳筠軒山水竹木卷

元舒頔

題竹木石圖

明劉基二首

題石生仲濂所藏李克孝竹木

明張以寧

扇中竹樹

明解縉二首

題竹木圖

明林環

李遵道竹樹圖

明吳寬

竹樹圖

明張寧

寫竹樹

明李日華

題高彥敬竹木圖

明僧大圭

錢舜舉畫黃花翠竹

明僧一初

題幽竹萱草圖

元陳基

松雪竹石蘭

元錢惟善

宣和墨竹寒雀

元虞集

題吳性存所藏趙仲穆竹枝雙螭圖

元張翥

題子昂疎竹遠山圖

元錢惟善

題竹柳圖

明陶安

題蕉竹圖

明陳繼儒

右司正之家渭川千畝圖

元元好問

次韻渭川春玉圖

元劉因二首

從周學士韻奉題竹岡

元程鉅夫二首

竹澗圖

元歐陽玄

題朱善慶竹泉卷

明周叙

題湘江竹林圖

明虞謙

湘竹圖 明廖道南

竹溪春曉圖 明解縉

水竹圖 明張寧

欽定四庫全書薈要卷一萬九千一百九十

集部

御定歷代題畫詩類卷八十二

蘭竹類

題東坡竹石

宋

黃庭堅

怪石岑峯當路幽篁深不見天此路若逢醉客應在萬
仞峰前

題子瞻畫竹石

宋

黃庭堅

風枝雨葉瘠土竹龍蹲虎踞蒼蘚石東坡老人翰林公

醉時吐出胸中墨

贈趙太虛畫竹石

宋

白玉蟾

竹魂竹魄竹精神飛落瀟湘淇水濱
千竿萬竿競青翠吸風飲露千年春
先生筆端自風雨驚起竹魂無著處
一點水墨化成龍龍孫飛去鷺溪住
先生把筆無逡巡造物不敢私為春
新梢勁節森寒玉鸞鳳無處棲夢魂
晉人神仙如孫且畫竹每每天作雨
唐人神仙如張璪畫竹每每聞鴈鳴
先生

自得入神手一竿兩竿發於酒當時大醉呼墨奴
一筆掃出竹千畝酒力安能奪化工先生煉就金
丹紅一粒陽光照肺腑森羅萬象羅心習有時持
出風中葉銀海不寒皆震懾有時持出雪中枝恍
如凍碧欺漣漪復能濡墨作石塊天然峭拔古且
怪沙中伏虎草中犀教人持向蓬萊賣竹之清虛
石堅硬以此發明真性命使人觀石及愛竹知有
真箇趙元靜先生醉時常風顛世人眼孔無神仙

我今珍藏數本畫雲鶴來也公歸天

陳德元竹石

二首

元好問

一片春雲雨未乾
兩枝新綠倚高寒
瘦龍不見金書字
試就宣和石譜看

花石綱船出太湖
九州膏血一時枯
阿誰種下中原禍
猶自昂藏入畫圖

子昂為閑閑畫竹石作別

元程鉅夫

仙舟發御河
別楮灑蒼波
雙樹尊前出
叢篁石

上多月明行亂影風靜倚柔柯還似看棋處尋雲
入薜蘿

畫竹石

二首

元虞集

質密谷中春事晚老鶴俛啄莓苔生長鳴戛戛雨氣潤
舞羽脩脩山月明

井中墮却翡翠釵海上拾得珊瑚鈎蒼龍過雨影在壁
斷雲零落令人愁

題高公畫竹石

元

黃潛

木葉蕭蕭半欲空
竹竿裊裊不成叢
絕憐意匠經營處
都在風烟慘澹中

題高尚書竹石

元楊載

矯龍疑蒼筠
踞虎肖白石
儻乘風雲會
變化那可測

畫竹石

元楊載

林前怪石起參差
篁竹叢深使客疑
如過瀟湘江上路
鷓鴣啼罷日西時

張月梅子昂竹石圖歌

元范梈

近來海內寫竹石集賢學士有李衍吳興翰林公更神
大抵不令石作板半幅蕭蕭烟霧枝如卷中有千尺奇
洞穴常起鬼神疑嵩華衡岱狎童兒金溪處士清似鶴
攜此隨秋訪幽壑我憶為公故寮吏細撫遺書雙淚落
吁嗟翰林今世無一筆猶可重江湖鳴鳳之下出瑾瑜
高風况足勵頑夫

題伯庸所藏子昂竹石

二首

元 袁 桷

伯夷清宜典禮子路勇誠冠軍日落虎驚沒羽潭幽龍

走凌雲

胸中丘壑玩世眼底烟雲凜秋岼幘欲澆磊砢解衣深
聽颼颼

王本中醉作竹石壁上

元
薩都拉

硯屏花落丹水香步虛白日聲琅琅江南道士愛瀟灑
新粉素壁如秋霜王郎酒後衫袖濕醉眼朦朧電光急
黑龍雲重雨脚斜白兔秋高月中泣倦遊借榻日觀東
恍惚舊夢三湘中鷓鴣聲斷江路遠青松雨暗春濛濛

題竹石圖

元 陳旅

藍田水曲青玉立
雨過秋光滿林濕
故人結屋傍幽崖
靜愛石牕晴翠入

柯氏山雲竹石圖

元 陳旅

溪上春山生白雲
鷓鴣啼處有湘君
行人來截昭華琯
日暮青林玉氣分

題熊雲巢竹石圖

元 陳旅

道人種竹三十箇
定有新巢宿鳳凰
石上幽香飄露粉

簷前新綠裊風簷天臺月白瑤笙近水國春寒翠袖長
見說故人東海上釣竿日暮倚扶桑

題王氏竹石圖

元 陳旅

老人雲錦溪邊住繞屋自種青珊瑚月明池露散林彩
春深雨苔生石膚短籬偏護籜龍子密葉並宿苞鳳雛
人生何用丹陽尹沙曲涼陰雙玉壺

小竹石圖

元 吳師道

千畝陰渭川萬仞峩華嵩兩竿卷石間蕭蕭亦清風

題高彥敬尚書竹石圖

元柳貫

尚書胸中貯秋色翠石蒼筠誰點筆當其被酒氣初酣
芒角森森出矛戟墨痕散作紙背光虎臥龍騰俱有迹
伯夷去後凜清風叔向生來古遺直見之冠佩不敢燕
矧是圓壇方薦璧房山西北弁山南二老交情嘗莫逆
陶泓毛穎始受呼不寫穠芳寫寒碧流傳此物成宅相
鈿軸縹囊新潢飾老夫饒口近更滋便欲歸山煮吾簣
詩成題作主林神未害西湖渠不識

題謝仲和竹石

元 郊 韶

江南謝老獨風流，愛寫晴雲竹樹幽。
絕似玉堂殘月夜，數枝晴雪映高秋。

題分宜趙尹所藏子昂竹石圖

元 歐陽玄

有客有客白其馬，汶篁移植燕山下。
歲寒心事木石知，雨露恩深詎能寫。

題松雪竹石

元 李孝光

幽篁碧悄悄，白石白粼粼。
帝子吹笙罷，月明愁殺人。

子昂竹石

元 劉永之

古研麝煤香書傳雨漏牆高齋對松雪隨意寫瀟湘

雲林畫竹石

元 華幼武

牕前梧竹倚高標簾底龍香不住燒記得醉眠清閨閣
一庭春雨暮瀟瀟

顧定之竹石

元 張雨

龍孫乍脫褊兒錦石面多皺彈子窩畫妙通神欲飛去
虎頭癡絕奈渠何

題前人竹石嘉樹圖

元

丁鶴年

翠實可充丹鳳食喬枝仍待早鶯遷一拳蒼蘚荒秋雨
惆悵無人解補天

題竹石圖

元

張天英

仙人手持青琅玕擲之飛上蓬萊頂玉簫彩鳳雲中鳴
龍影醉眠山骨冷

題王黃鶴竹石便面

元

陶宗儀

貌得寶篋墨未乾蕭蕭離立萬琅玕此君心事堅如石

一握清風拂面寒

題綠竹蒼石圖

為萬竹山人壽

元 陶宗儀

粉香翠影碧琅玕
丹鳳林中第一竿
雨露恩濃磐石固
清風日日報平安

題柯敬仲石竹

元 唐 肅

蘊真齋裏揮毫日
多得青城太史題
今日南州把遺墨
石簟秋冷蟋蟀啼

管夫人竹石

明 朱應辰

夫人寫竹如寫字不墮畫家蹊徑中料得山房明月夜
脩然葉葉動秋風

管夫人竹石

明
丁明

能書獨數衛夫人墨沼春香教右軍近代苕溪惟魏國
却將八法寫湘君

管夫人竹石

明
朱楨

魏國夫人翰墨香愛拈湘管寫幽篁不如凍成五色練
繡出朝天補袞裳

管夫人竹石

明鄭元

誰裁弄玉碧雲簫吹過瓊臺月影遙白鳳一雙何處下
水晶宮裏赤闌橋

松雪畫竹石圖

明盧熊

紺箬生清風蒼苔護幽石夢想玉堂仙臨池弄秋碧

松雪畫竹石圖

明秦約

常時奉詔直金鑾日轉鰲峰玉筆寒想得花間鈴索靜
自將賜墨寫琅玕

松雪畫竹石圖

明張適

玉堂飛墨寫湖州彷彿鷗波竹樹秋珍重王孫歸未得
淡烟斜月不勝愁

松雪畫竹石圖

明許性

燕間天祿校書餘墨汁金壺寫竹圖長恐震雷風雨作
化龍飛去入雲衢

子昂竹石

明金幼孜

翡翠臨風好珊瑚出海清江南春事晚暮雨鷓鴣聲

題倪雲林竹石

明 高遜志

卷石不盈尺孤竹不成林惟有歲寒節乃知君子心

雲林畫竹樹秀石

元 饒介

斷劒故留碧錯刀終有神坡陀歲寒色不似醉時真

雲林畫竹樹秀石

三首

明 于思緝

喬木千章高出雲幽篁幾個石嶙峋平生丘壑真成癖
莫怪烏藤來往頻

蒼然古木石巖幽移得江南一段秋共說倪君知籀法

數竿瀟灑更風流

木落秋吟夜露翻山空無人石榻寒不似君家子午谷
雲旗晝下玄都壇

雲林畫竹樹秀石

明 陳允明

長憶山中舊草廬蒼厓古木共扶疎今朝偶爾看圖畫
便擬身同木石居

雲林畫竹樹秀石

明 余銓

三春雷雨蒼龍角萬里雲霄翠鳳毛怪得君家圖畫裏

虛牕涼月夜蕭騷

題竹石小畫

明程本立

玉堂仙人松雪公寫竹正似石室翁雲林道人雖後出
往往落筆生秋風吳人好書仍好畫百年遺墨千金價
比來何處得此圖松雪雲林此其亞娟娟嫩玉纔數莖
烟稍雨葉縱復橫洞庭寒骨沉水底鐵索下取蛟龍爭
却憶江南舊池館筆牀碁局何蕭散一行作吏事便廢
十年不歸夢欲斷松雪子孫今幾人雲林弟子誰逼真

得歸故鄉倘相覓竹枝挂我頭上巾

許秋官壁間竹石

明陳璘

孤根托奇石高節近清暉更愛幽香發隨風入翠幃

竹石圖

明史傑

雨餘苔石淨無泥翠影參差夕照低記得推篷湘水曲
滿林秋色鷓鴣啼

為人題竹石

明王世懋

紫籜成枝綠乍敷纖柔應傍玉山扶慙慙看取琅玕色

莫遣儂家一日無

與達甫燕坐小齋為寫竹石

明 文徵明

對坐焚香習燕清
好風如水汎簾旌
夕陽忽見踈疎影
落木空江生遠情

泉石脩篁圖

明 林 瀚

碧雲數畝湘江曲
誰種江千萬枝玉
枝枝散影落晴波
波光掩映林光綠
有時颯颯來清風
不比金谷飄春紅
翠鳳辭巢鳴舜日
蒼蚪捲霧騰遙空
巖巖巨石苔花紫

砥柱中流儼如許障斷紅塵半點無六月坐來不知暑
遠峰天際青螺浮蔣徑嶰谷輕烟收山中定有脫俗者
可似當年王子猷子猷一去今千載此君清致依然在
冰霜萬壑歲寒時勁節虛心終不改

題張端衡竹木石畫

宋 劉 宰

槎牙高樹蕭騷竹絕島風烟開短軸更煩點筆作衰翁
嘯月吟風飲山渌

題朱郎竹木

元 虞 集

江上復春雨曾陰覆碧波石高龍影臥林迴鶴聲過解
珮猗蘭浦揚旂落木坡佳人翠袖薄日暮欲如何

題朱卿竹木

元虞集

猗猗淇園竹結根磐石安枝幹相扶持風雨不可干其
實鳳所食君子思保完恒恐聲影疏蕭條霜露寒金玉
慎高節千載承清歡

柯敬仲畫古木疎篁

元虞集

不見丹丘四五年幽篁古木更蒼然蒹葭霜露風連海

翡翠蘭苔月在川憶昔畫圖天上作每題詩句世間傳
前邨深雪誰高臥亦有晴虹貫夜船

竹樹圖

元 楊 載

荊棘蒙龍迷竹樹亂堆古石蒼苔護縱獵青郊懷舊路
躍馬重岡追狡兔箭翎落地無尋處

題竹樹圖

元 范 梈

老樹半垂葉疎篁斜露根若無烟霧隔應見石西邨

題枯木竹畫

元 李 祁

脩筠儀鳳羽枯木老龍鱗半夜聞風雨方知筆有神

鄭子聲竹樹圖

為僧別
峰作

元
黃鎮成

空谷有佳人連蹇歲年暮清顏不可見香墨在紈素江
山澹微茫起我滄洲趣白石隱疎篁秋霜懸老樹天高
鴻鴈稀水落沙觜露上人心迹空對此了言句亦欲棹
孤篷雲深不知處

題李遵道畫竹木圖

元
薩都拉

風流未識生前面翰墨空遺死後名鳳尾拂雲秋有影

龍頭出水夜無聲
半生清節江南夢
萬里靈槎海上行
應逐錦袍弄明月
倒騎赤鯉對吹笙

題張藻仲竹木

元戴良

不見張生已六春
筆頭何事轉清新
鳳毛染得龍池雨
寫寄寒林獨立人

商德符李遵道共畫竹樹

元丁復

仁皇新寺九天上
二老渭川千畝圖
晚向江南逢小米
只今俱是世間無

題柯敬仲竹木

元 楊維禎

洞庭秋盡水增波光動珊瑚碧樹柯夜半仙人騎紫鳳
滿天清影月明多

題竹樹圖 二首

元 倪瓚

海中鐵網珊瑚樹石上銀鈎翡翠梢
烏夜亂啼江月白
檀欒飛影下牕坳

江邊樹影墨模糊江上青山日欲晡
野思悵然無晤語
時來臨水照眉鬚

為蹇原道題竹木圖

元倪瓚

疎篁古木都成老石澗莓苔亦有花排悶不須千日酒
聊將小筆畫龍蛇

商德符李遵道共畫竹樹

元張雨

壽巖樹石黃巖竹善畫如今最得名更得二公同一幅
千金酬價尚嫌輕

題海寧吳筠軒山水竹木卷

元舒頔

世間名士多愛竹為愛扶疎伴幽獨虛心直節傲雪霜

盡日相看看不足松蘿山下延陵裔自號筠軒詠淇澳
明牕淨几泚霜毫煖日晴風弄蒼玉有時乘興寫山水
復貌時人真面目一丘一壑曾次奇萬貌萬形心匠蓄
瀟瀟灑灑聲秋軒瑟瑟琅琅撼昏屋我家昔寓湘江濱
此君與我情最親別來廿載世離亂蹤跡萍梗無音塵
適與筠軒偶相見一笑袖拂松蘿昏怡然贈我一幅畫
滄江萬頃波粼粼遠岫雲開虎嘯月疎林霜落鴻來賓
抱琴疑是林和靖谷口又類鄭子真扁舟蕩漾空闊際

蘆花兩岬紛續續感子高情寫幽趣世無管鮑行跋跋
明朝漁翁約我度谿曲彷彿又似桃源人

題竹木石圖

二首

明劉基

凌霜傲雪無人問拂水捎雲意自閑願就姮娥借明月
臥看鸞鳳舞空山

古木蕭森傍水隈鳳凰飛去不飛回披烟細看蒼筤葉
知是湘君淚濕來

題石生仲濂所藏李克孝竹木

明

張以寧

息齋之孫李公子盡將幽意入經營修篁石上生雲氣
古木山中作雨聲年來好畫不忍見歲晏故園空復情
烏巾挂在長松樹吾欲巢居逃姓名

扇中竹樹

明解縉

廣寒夜拆雙鸞去竹實銜來孕籜龍一夜風雷鱗甲動
坐看六合灑清風

扇中竹樹

明解縉

常時十五二十過手弄素月雲間磨廣寒椎碎墮蛟室

龍影歛入扶桑波向道仙人一桂樹秋聲那得萬竿多
洞庭日本通銀河姮娥夜宴邀湘娥曙色雞鳴奈樂何
葉下西風片雨青玉堂人靜酒初醒扁舟却憶經行處
湘水寒烟接洞庭

題竹木圖

明 林 環

李遵道竹樹圖

明 吳 寬

薊丘常共此君游又向人間見小丘滿目疎篁連古木
偶然臨楮忽驚秋

竹樹圖

明 張寧

白石滄波野自宜
歲寒心事晚猶遲
蕭蕭野影疎疎葉
吹盡秋風君不知

寫竹樹

明 李日華

幽人讀書罷曳屐
步春泥沉綠滲石
骨輕翠翻雲猗鶴
來忽墮羽山影庭
前移

題高彥敬竹木圖

明 僧大圭

尚書縱筆寫新圖
古木疎篁半有無
厓雨未收泉散漫

山雲不斷雪模糊鳳鳴朝日來阿閣龍去秋天泣鼎湖
前代風流那復見幾回清夢繞燕都

錢舜舉畫黃花翠竹

明

僧一初

擬買陶家地一弓却看圖畫感秋風向來翠竹黃花圃
多在空山暮雨中

題幽竹萱草圖

為陳元
禮作

元

陳基

報妾平安信知君遠戍身好花難作佩留慰北堂親

松雪竹石蘭

元

錢惟善

鳳凰棲老楚琅玕白雪深
蘭一再彈空憶玉堂聽雨夜
不知翠袖倚天寒

宣和墨竹寒雀

元虞集

灑墨寫琅玕深宮春晝閑
蕭條數枝雪不似紆千山

題吳性存所藏趙仲穆竹枝雙螭圖

與玉山同賦

元張翥

滿叢鮮碧露團香院落春
紅過野芳蛺蝶一生花裏活
飛來還戀竹風涼

題子昂疎竹遠山圖

元

錢惟善

玉立湘江闊東風不自持巫山何處是春雨埽蛾眉

題竹柳圖

明

陶安

竹以招伯夷柳以招靖節安得同此人踏殘滿庭月

題蕉竹圖

明

陳繼儒

虛心似脩竹無心似芭蕉是誰寫竹復寫蕉
牕前秋思何蕭蕭黃茆板屋朱闌橋
此中清福真難消歸與歸與
吾與汝竹上清風蕉上雨

右司正之家渭川千畝圖

元
元好問

官街塵土霧中天，入眼荒寒一灑然。
大似終南山下看，北風和雪捲蒼烟。

老眼蕭郎筆有神，巖姿洲景盡天真。
情知一段幽閒趣，不必清談著晉人。

次韻渭川春玉圖

二首

元
劉因

至人虛心實其腹，手種琅玕如種玉。
晴雲散墨春思浮，咫尺經營千畝足。
清標亭亭儼矜潔，笑脫斑斕賜膏沐。

揚旌植纛神君遊萬籟無聲江水涿此君之志那可量
榮辱相忘在空谷大宜蓬萊之三山小宜武夷之九曲
前如綺園歌紫芝後若夷齊侍孤竹喻麋之墨清且奇
脫落玄黃乃真目幽齋尸居耿相對有客叩門深絕俗
天空日沉碧雲湛細酌寒泉芼秋菊夢迴倚杖森在廷
熒熒雙瞳鬢深綠

瑤林羣仙歌捧腹解帶蘭皋捐佩玉深知五采眩空花
守墨空巖思濯足層冰急雪成九轉重露輕烟方一沐

湘君寶瑟調初絕，唯見遙峰蘸寒綠。
長空旋宮起萬籟，翠袖無言守山谷。
紛紛落葉漫渭水，耿耿殘花守韋曲。
論功歲晚端有意，深媿羣英不如竹。
森然壁立聯堵牆，變化淋漓傾衆目。
高人宴坐不出門，一榻常懸謝鷺俗。
每令此君當上坐，末席餘清友松菊。
回首故園新雨晴，無盡春風吹草綠。

從周學士韻奉題竹岡

二首

元程鉅夫

淡墨重看帶路塵，去年今日正行春。
不知誰有千竿玉。

我欲林中著此身

江湖滿眼歎殊鄉
寒碧沉沉華子固
翰與咸寧吳令尹
此君長伴兩相忘

竹澗圖

元 歐陽玄

青林翠巘俯江郊
谷口湍流巨石坳
戛玉萬竿鳴水樂
垂紳雙瀑盪雲旂
風漪靜浸蒼龍影
月瀨光搖紫鳳巢
歌罷商巖採芝曲
兩翁翰墨定神交

題朱善慶竹泉卷

明 周 叙

庭栽綠竹自清幽更引寒泉入檻流
鏡影淨涵淇澳霧金聲遙曳渭川秋
陰凝翡翠烟光合潤浥簾櫳雨氣浮
更說蔣生能賦詠坐看三徑思悠悠

題湘江竹林圖

明 虞謙

秋風嫋嫋湘江曲秋水瀟瀟湘水綠
湘江之人美如玉翠袖天寒倚脩竹
鷓鴣時來林外啼鳳凰夜向枝頭宿
我欲因之泛長江歷蒼梧兮覽瀟湘
天高海闊白日靜九疑山色雲茫茫
雲茫茫增煩紆忽憶山中二三月如

有紫筍食有魚開軒賦就淇園句都向琅玕節上書

湘竹圖

明 廖道南

湘園千畝種琅玕湘水泠泠濕翠寒萬嶂參差雨初霽
鳳翔千仞宿雲端

竹溪春曉圖

為劉孟
雅題

明 解縉

武林溪遠桃千樹汴水春深柳萬條何似此君多勝概
偏宜清隱絕塵囂翠禽啼處烟如織錦籜裁來雪未消
却笑此生慙六逸相思為寄白雲謠


水竹圖

明
張寧

漠漠孤烟合
盈盈一水深
汗青誰涉采
猗菜自行吟
野色將秋思
江聲併夕陰
可憐桃李月
風雨斷幽尋



御定歷代題畫詩類卷八十二



總校官庶吉士臣侍朝

校對官庶吉士臣徐如澍

謄錄監生臣張耀臺

欽定四庫全書薈要

集部

御定歷代題畫詩類卷八十三

四

詳校官原任主事

臣
李斯咏

欽定四庫全書薈要

御定歷代題畫詩類卷八十三目錄

花卉類

戲賦墨畫梅花 宋李綱

墨梅 宋朱子

墨梅 宋張栻二首

墨梅 宋呂居仁

墨梅 宋張子文

墨梅 宋僧祖可

墨梅 金劉仲尹十首

墨梅 金楊邦基

墨梅 金趙秉文

水墨梅花 元戴表元

墨梅偶賦 元王惲

墨梅圖 元袁桷二首

題墨梅 元馬祖常

墨梅 元宋元

題墨梅圖 元蒲道源

夢題墨梅 元揭傒斯

題畫墨梅 元吳萊

墨梅 元傅若金三首

墨梅 元宋瑩

次韻題墨梅 元黃潛

墨梅 元李孝光

題墨梅卷子 元成廷珪

墨梅 元成廷珪

墨梅 元黃石翁

題墨梅 元吳鎮二首

題墨梅圖 元王冕二首

題墨梅 元劉永之三首

墨梅 元倪瓚

墨梅 元馬臻

墨梅 元蕭和

墨梅 元張復亨

墨梅 元錢惟善

墨梅 元趙孟堅

題畫墨梅 元陶宗儀二首

墨梅 元張庸

墨梅 明貝瓊

墨梅 明徐賁

題墨梅 明練子寧

題墨梅 明邱濬

題墨梅 明鄭真

墨梅 明李暉

題墨梅贈楊稷 明金幼孜

墨梅 明陳煒

墨梅 明倪岳

題畫梅 元陳旅

題畫梅 元王冕四首

應教題梅 元王冕

題畫梅 元貢性之十一首

題畫梅 明劉基

畫梅 明方孝孺

畫梅 明牛諒

題畫梅 明朱經

畫梅 明王誼二首

自題畫梅

明金琮

題梅送友

明徐章

題畫梅

明許天錫

畫梅

明陳淳

題畫梅

明秦旭

題畫梅

明謝士元

題畫梅

明徐渭二首

畫梅

明僧大遂

畫梅 明僧清遠二首

欽定四庫全書薈要卷一萬九千二百九十一

集部

御定歷代題畫詩類卷八十三

花卉類

戲賦墨畫梅花

宋

李綱

道人畫手真三昧力挽春風與遊戲露枝烟蕊忽
嫣然自得工夫畦徑外由來黑白無定姿濃淡間
錯相參差炯如落月耿寒影翳若宿霧含疎枝羣
芳種種徒繁縟脫略丹青尤拔俗妙質聊資陳氏煤

幽姿好伴文生竹世呼墨竹為墨君此花宜稱墨夫人
鉛華不御有餘態世間顏色皆非真年來妙觀
齊空色天花時露真消息試煩幻出數十枝不費
梁谿一丸墨

墨梅

宋朱子

夢裏清江醉墨香蕊寒枝瘦凜冰霜如今白黑渾休
問且作人間時世妝

墨梅二首

宋張栻

眼明三伏見此畫便覺冰霜抵歲寒喚起生香來不斷
故應不作墨花看

日暮橫斜又一枝水邊記我獨吟時不妨更作江南雨
併寫青青葉下垂

墨梅

宋

呂居仁

嶺南十月春漸回妍暖先到前村梅問君何處識此
妙一枝冷艷隨霜開長江凜凜欲崩岸乃見好事移
牆隈初疑滲漉入瘴霧更恐寂寞埋烟煤微風不動

暗香遠淡月入戶空徘徊坐看粉黛化羶惡豈但桃李成興臺我行萬里厭窮獨疾病未已心先灰對此不覺三歎息恐是轉側同南來異鄉久處少意緒破壁相對無根荄古來寒士每如此一世埋沒隨蒿萊遁光藏德老不耀肯與世俗相追陪輪囷離奇一作護落多見用犧尊青黃木為一作木災含毫吮墨去顏色況自不必須穿栽歲窮路遠莫惆悵此去保無蜂蝶猜

墨梅

宋 張子文

筆端喚醒玉梅魂
滿袖春風不見痕
未許卷簾新月上
却教烟雨惱黃昏

墨梅

宋 僧祖可

不向江南冰雪底
乃於毫末發春妍
一枝無語淡相對
疑在竹橋烟雨邊

墨梅 十首

金 劉仲尹

瘦損昭陽鏡裏春
漢家公主奉烏孫
淚痕滴盡穹廬月

誰道神香解返魂

絕纓人醉燭花殘
主意方濃未厭歡
十五瓊兒梳洗薄
琵琶才許近簾彈

生憎施粉與施朱
換骨玄都亦自姝
疎影冷香題不到
夢驚烟雨暗西湖

趙郎愛香人不知
羅浮山下有佳期
春寒徹骨角聲起
才記參橫月墮時

君王鳳駕九龍池
後輦傳呼召雪兒
狼籍玉臺銀燭暗

丁香小麝印宮眉

鐘鼓沉沉度苑牆
玉繩初直殿東廂
荀妃早發鷄鳴埭
殘月微分燭下妝

衡州何處問花光
抹月批風只欠香
安得江南腸斷句
為題風雨浣啼妝

高髻長蛾滿漢宮
君王圖玉按春風
龍沙萬里王家女
不著黃金買畫工

古絹誰藏謝女真
天寒翠袖一招魂
江山嫁盡風流夢

雪滿氷溪月挂村

妙畫工意不工俗老子見畫只尋香未應塗抹相欺得
政自不為時世妝

墨梅

金
楊邦基

粉蝶如知合斷魂啼妝先自怨黃昏
華光筆底春風老
寂寞嶺南烟雨痕

墨梅

金
趙秉文

墨師不作脂粉面却恐傍人嫌我
真相逢莫道不相識

夏馥從來琢玉人

水墨梅花

元戴表元

江海歸來見侶人
離披猶自少風塵
何如淡月山莊夜
百幅清溪亂寫真

墨梅偶賦

元王惲

梅華天質本紅黃
玉潔冰清徹骨香
近為世間貪豔客
硬隨時世作新妝

墨梅圖

二首

元袁桷

鐵石冰霜百世身疎明瘦直一生真
玄雲借我凌寒便直上鈞天試早春

雪繭輕蒙絕點塵小牕晴日得橫陳
夢回猶記溪橋路黯淡相看喜似人

題墨梅

元馬祖常

花開不占洛陽春野店山橋雪月新
豈是歲寒偏偃蹇還愁金谷墜樓人

墨梅

元宋元

生意玄烟裏春工毛穎中枝頭兩三蕊開不假東風似
到孤山下斜枝入眼中分明幾點雪欲折又成空

題墨梅圖

元 蒲道源

春風不解惜瓊英可是招魂有客卿記得小橋曾度處
數枝和月浸溪明

夢題墨梅

元 揭傒斯

霜空冥冥江水暮江上梅花千萬樹無端折得一枝歸
一雙蝴蝶相隨飛

題畫墨梅

元 吳 萊

北風吹倒人古木化為鐵一花天下春萬里江南雪

墨梅

元 傅若金

天涯不見遙相憶
牕外重逢乍欲迷
彷彿空山明月夜
一枝初出古牆西

題墨梅 二首

元 傅若金

老樹亞晴空
疎花帶寒野
風流不自惜
澹泊從人寫
歲晏孰能娛
空山少來者

孤花何婉婉玉立含幽素短短時出橋疎疎或臨路生
疑簷下月半照牆西樹

墨梅

為李華
遠作

元
宋 璣

風香月影雪肌膚朔客晴牕看畫圖江北江南數千里
夢魂何處覓西湖

次韻題墨梅

元
黃 潛

一自攜家湖水東放舟時度玉花叢因君貌得橫斜影
閑却孤山月一篷

墨梅

元 李孝光

銀蟾呵春墨花碧香落江南濃欲滴孤山招得老逋魂
白鶴歸來楚雲黑王孫歲晚客京華衣上緇塵深一尺
小姬未嫁怨東風夜夜高樓吹鐵笛

題墨梅卷子

元 成廷珪

千年老枝生鐵色雪魄冰魂誰貌得三生石上見逋仙
獨鶴歸來楚雲黑何郎垂老客揚州花前勸酒仍風流
江城吹笛月未落夢回一夜生春愁

墨梅

元 成廷珪

東閣衝寒雪一枝巡檐偏解索題詩何郎老去風情減
羞見疎花照鬢絲

墨梅

元 黃石翁

去年曾訪林君復烟水蒼茫鶴未歸不似對君橫小幅
一枝和雪照柴扉

題墨梅二首

元 吳鎮

粲粲江南萬木妃別來幾度見春歸相逢京洛渾依舊

却恨緇塵染素衣

玉府仙姝倚澹妝素衣一夕染玄霜相逢不訝姿容別
為住王家墨沼傍

題墨梅圖

元王冕

朔風吹寒冰作壘梅花枝上春如海清香散作天下春
草木無名藉光彩長林大谷月色新枝南枝北清無塵
廣平心事誰與論徒以鐵石磨乾坤歲晚燕山雲渺渺
居庸古北無人到白草黃沙羊馬羣瓊樓玉殿烟花繞

凡桃俗李爭芬芳只有老梅心自常貞姿燦燦眩冰玉
正色凜凜欺風霜轉身西冷隔烟霧欲問逋仙杳無所
夜深湖上酒船歸長嘯一聲雙鶴舞

墨梅

元
王冕

我家洗研池邊樹朵朵
顏色只留清氣滿乾坤

一作
箇箇

花開澹墨痕不要人誇好

題墨梅

三首

元
劉永之

郭西茅屋經年別嫩蕊疎枝入夢頻何處幽尋重相憶

寒雲野水月如銀

茅屋蒼苔野水濱
歲寒冰雪久相親
江湖後夜扁舟夢
猶記尊前對玉人

仙館曾逢玉帶姿
夢中要作曉寒詞
於今相對情如水
唯有清霜繞鬢絲

墨梅

元倪瓚

幽蘭芳蕙相伯仲
江梅山礬難弟兄
室裏上人初定起
靜看明月寫敷榮

墨梅

元馬臻

疎葩結冷光，素質凝古色。
濡毫誰氏子，巧奪真宰力。
展卷如有訴，老兔向天泣。
髣髴月沈時，影落參旗直。
夜久書燈青，鴻飛楚天黑。
寒香忽破鼻，幽意不可得。
悠悠感物理，對此成太息。
我欲將贈遠，真幻莫相識。
長嘯臨春風，春風浩無極。

墨梅

元蕭和

江邊春色歸何處，長憶年年花發時。
愛殺南枝如許瘦，

却愁羌管不勝吹

墨梅

元 張復亨

皎皎姑射姿寒香淡孤月歲落耿幽貞江空照竒絕何處碧參差吹落南枝雪因之託豪素夜半清輝發一洗京洛塵芳菲不堪折踟躕坐消憂何待清尊竭

墨梅

元 錢惟善

小橋流水雪晴時曾折幽芳寄所思明月觀深春夢遠玉堂仙客寫橫枝

墨梅

元 趙孟堅

濃寫花枝淡寫梢鱗皴老幹墨微焦筆分三踢攢成瓣
珠暈一團工點椒糝綴蜂鬚凝笑靨穩拖鼠尾施長條
盡吹心側風初急猶把枝埋雪半消松竹襯時明掩映
水波浮處見飄飄黃昏時候朦朧月清淺溪山長短橋
閣裏相挨如有意靜中背立見無聊筆端的歷明非畫
軸上縱橫不是描頓覺生成春盎盎因思行過雨瀟瀟
從頭總是楊家法拚下工夫豈一朝

題墨梅

元 陶宗儀

華光三昧幻冰魂
滿紙春風帶墨痕
好似孤山亭子上
一枝斜映月黃昏

題畫墨梅

元 陶宗儀

明月孤山處士家
湖光寒浸玉橫斜
似將篆籀縱橫筆
鐵線圈成箇箇花

墨梅

元 張庸

玉顏不似向來真
猶自梨花入夢頻
安得影娥池上水

為渠一一洗緇塵

墨梅

明 貝瓊

雪後尋梅恐未真
華光一日寫花神
廣寒玉免分秋穎
剪斷羅浮萬樹春

墨梅

明 徐賁

素質卻嫌脂粉蛾
眉淡掃玄霜翰
墨玉堂曾侍硯池猶
染餘香

題墨梅

明 練子寧

姑射山人玉佩環瓊簫和月上青鸞素衣不受緇塵染
留與江南歲晏看

題墨梅

明丘濬

老龍半夜飛下天蜿蜒斜立瑤階裏玉鱗萬點一齊開
凝雲不流月如水

題墨梅

明鄭真

先春遠寄墨淋漓折得寒香第一枝夢遶西湖山月暗
漆紗牕外影參差

墨梅

明 李璫

烏不涅而黔鵠不浴而白其類雖有殊各以見真色畫
師亦何心變幻隨世惑展圖對梅花為爾心惻惻

題墨梅贈楊稷

明 金幼孜

素質比瑤瑰貞心不易摧江南春信早先寄一枝來

墨梅

明 陳輝

每愛橫枝醉裏看蒲林風雪浩漫漫數聲殘笛知何處
吹落空江片月寒

墨梅

明倪岳

歲華欲晏嚴冰霜山林萬木皆摧傷
天意獨爾儲孤芳根柯屈鐵何堅剛
冰花競發先春陽傲睨六出紛迴翔
珠璣錯落生夜光天風習習飄清香
姑射仙人整靚妝鉛華淨洗曳素裳
江妃緩步鳴佩璫縞袂輕舉聲鏗鏘
翠禽飛來月色涼玉笛吹斷空徬徨
舉杯澆我鐵石腸浩歌一曲天茫茫

題畫梅

元陳旅

處士橋邊古岸隈，梅花偏向小園開。
衝寒有客尋春去，移得晴窗雪影來。

題畫梅 三首

元王冕

朔風撼破處士廬，凍雲隔月天模糊。
無名草木混色界，廣平心事今何如。
梅花荒涼似無主，好春不到江南土。
羅浮山下蘼蕪烟，瑪瑙坡前荊棘雨。
相逢可惜年少多，競賞桃杏誇豪奢。
老夫欲語不忍語，對梅獨坐長咨嗟。
昨夜天寒孤月黑，蘆葉卷風吹不得。
髑髏夢老皮蒙茸。

黃沙萬里無顏色老夫瀟灑歸巖阿自鉏白雪栽梅花
興酣拍手長嘯歌不問世上官如麻

君不見漢家功臣上麒麟氣貌豈是尋常人又不見唐
家諸將圖凌烟長劍大羽聯貂蟬龍章終匪塵俗狀虎
頭乃是封侯相我生山野無能為學劍學書空放蕩老
來晦迹巖穴居夢寐未形安可模昨日冷飈動髭鬚拄
杖下山聞鷓鴣烏巾半岸衣露肘忘機忽落丹青手器
識可同莘野夫孤高差擬磻溪叟山翁野老爭道真松

簞節操梅精神吟風笑月意自在只欠鹿豕來相親江
北江南競傳寫祝君歎其才盡下我來對面不識我何
者是真何者假祝君放筆一大笑不須攬鏡亦自小相
携且買數斗酒坐對青山恣傾倒明朝酒醒呼鶴歸白
雲滿地芝草肥玉簫吹來雨霏霏琪花亂飈春風衣祝
君許我老更奇我老自覺頭垂一作如絲時與不時何以
為時與不時何以為贈君白雪梅花枝

江南十月天雨霜人間草木不敢芳獨有溪頭老梅樹

面皮如鐵生光芒朔風吹寒珠蕾裂千花萬花開白雪
彷彿蓬萊羣玉妃夜深下踏瑤臺月銀鐺泠泠動清韻
海烟不隔羅浮信相逢共說歲寒盟笑我飄流霜滿鬢
君家秋露白滿缸放懷飲我千百觴興酣脫帽恣磅礴
拍手大叫梅花王五更牕前博山冷么鳳飛鳴酒初醒
起來笑抱石丈人門外白雲三萬頃

題畫梅

元
王冕

疎花粲粲照寒水瑤坡前春獨回却憶去年風雪裏

吹簫曾棹酒船來

應教題梅

元 王冕

刺刺北風吹倒人
乾坤無處不沙塵
從軍凍死長城下
誰信江南別有春

題畫梅

元 貢性之

江南十月霜雪飄
杖藜東郊復西郊
酒酣不憚行路遙
蹋遍第六西湖橋
北風獵獵吹枯梢
青天有鶴不可招
逋仙起舞來解嘲
請君與我看此高堂素壁一幅之生

綃

畫梅

元
貢性之

月下獨吟時寒香暗襲衣
直疑春信早蝴蝶作團飛

題梅

四首

元
貢性之

平生心事許誰知
不是梅花不賦詩
莫向西湖蹋殘雪
東風多在向陽枝

第六橋頭雪乍晴
杖藜曾引鶴同行
詩成酒力都消盡
人與梅花一樣清

朔風撲面凍雲垂
引鶴衝寒出郭遲
却憶西湖霜月下
美人相伴立多時

江城鐘鼓夜迢迢
霜月多情照寂寥
更有梅花是知己
小牕斜度兩三梢

題畫梅送友人

元貢性之

折梅江上贈人行
此是東風第一程
從此不須憑驛使
看花直到豫章城

題畫梅四首

元貢性之

濕雲壓地雪花乾一日狂風十日寒
不管春光滿鄰屋却從牆角借來看

美人別後動深思春到南枝總未知
記取灞橋明月夜忍寒花下立多時

羅浮山下著青鞋蹋雪曾看爛漫開
好似人家茅屋底一枝先占短牆來

十月江南正苦寒花開如雪雪成團
如今老盡咸平樹只寫前身畫裏看

題畫梅

明

劉基

天桃能紫杏能紅
滿面塵埃怯晚風
爭似羅浮山礪底
一枝清冷月明中

畫梅

明

方孝孺

微雪初消月半池
籬邊遙見兩三枝
清香傳得天心在
未許尋常草木知

畫梅

明

牛諒

梨花雲底路參差
折得春風玉一枝
南雪未消江月曉

欲從何處寄相思

題畫梅

明 朱經

疎烟小暈生瑤島仙鑑星明試妝早雲母屏風曉日寒
玉龍嘶天春不老憶昔相逢萼綠君別來珠珮留蒼雲
素鸞驚舞月破碎瓊臺歌斷音紛紛靈魄解點玄霜汁
粉靨冰花照人濕返魂竟失篋中香翠羽悲啼聲轉急
紛吾欲下巫陽招楚騷遺恨湘川遙書憑鳳女雙飛翼
淚掩鮫妃一尺綃

畫梅 二首

明 王 誼

揚州詩閣掩芳塵萬萼千葩冷照春
十里珠簾一聲笛
東風腸斷倚樓人

曾赴孤山處士招水烟寒淡月魂銷
笛聲喚醒梨雲夢
記得東風倚畫橈

自題畫梅

明 金 琮

一別西湖未得歸孤山風月近何如
春來賸有看花興
又向君家寫折枝

題梅送友

明 徐章

萬樹籠香陣，白雲孤山深處隔。
塵氛玉顏為惜君歸去，却向東風瘦幾分。

題畫梅

明 許天錫

桐江野客半枯槁，只有梅花與傾倒。
蹇驢破帽過南村，不為梅花破煩惱。
交情冷淡無人知，怪我凌寒起常早。
江頭臘月正月間，雪裏十枝九枝好。
自從作客向天涯，萬里風烟跡如埽。
是誰寫出斷腸魂，坐對相思令人老。

可憐兩度度春光不得香名入詩草
今朝試筆為君題
清淚如絲灑玄昊

畫梅

明 陳淳

風引上春香雪弄南枝色為有惜花心樓中莫吹笛

題畫梅

明 秦旭

沙際春烟濕未消落梅風急送輕橈
江邊有客尋詩去
應在西湖第六橋

題畫梅

明 謝士元

羅浮仙子真嶠奇天然標格冰霜姿歲寒心事老天識
調羹手段何人知以茲落魄孤山下弄月吟風足瀟灑
冥心靜裏悟乾坤自有香風抗蘭麝今日塵埃偶相逢
巡簷索笑聲淪淪相邀欲問徂徠子當年何事受秦封
江空歲晏路云邈且爾寄傲南牕中

題畫梅

二首

明
徐渭

鳬牛兩碟酒三卮索寫梅花四句詩想見元章愁米日
不知幾斗換冰枝

從來不見梅花譜信手拈來自有神不信試看千萬樹
東風吹著便成春

畫梅

明
僧大遂

古幹橫斜意自奇半開半蕊亦相宜寒時悔不前村覓
知是溪橋第幾枝

畫梅二首

明
僧清遠

瑤臺夕承月玉砌曉凝霜花映含章發枝橫禁籞長春
風似相識偏惜壽陽妝

折得江南春
悵望洛陽客
悠悠歲年暮
浩浩風塵隔
遠道勿相思
相思減容色

御定歷代題畫詩類卷八十三

欽定四庫全書薈要

御定歷代題畫詩類卷八十四目錄

花卉類

王伯敬所藏趙昌梅花

宋蘇軾

趙昌折枝

元袁桷

題華光為曾公卷作水邊梅

宋黃庭堅

觀華光長老仲仁墨梅

宋鄒浩

題華光墨梅

元王惲二首

題徽廟馬麟梅

元鄭東

題徽廟馬麟梅

元陳基

宋徽宗畫半開梅

明張迪

題王元章梅

元陳基

王元章梅

元鄭元祐二首

王元章白描梅

元鄭元祐

題王元章梅

元熊夢祥二首

題王元章梅

元張渥

題王元章梅 元丁復

題王元章畫梅 元楊維禎

題王元章梅 元于立

題王元章墨梅 元釋子賢

題王元章梅花圖 明劉基

王元章墨梅 明張羽

題王元章梅花和韻 明顧璘

題王元章梅竹卷 明顧璘

王元章倒枝梅畫

明徐渭

王元章作墨梅并題長句書其後

明陸完

題徐聖可知縣所藏楊補之二畫

宋樓鑰

補之畫梅

元程鉅夫

題楊補之梅卷

元高儀父

題楊補之梅

元劉詵

楊補之雪梅圖

明吳寬

題柯敬仲梅

元杜本

題柯敬仲梅花竹石圖

元郭翼

題柯博士梅竹圖

元鄧韶

柯丹邱梅竹

元倪瓚

題柯丹邱梅竹

明僧元璞

松雪墨梅

元鄧文原

題松雪墨梅

元錢惟善

趙子昂梅竹圖

明解縉

舜舉梅竹折枝

元程鉅夫

題錢舜舉畫梅

元戴子璋

題錢舜舉所畫梅花卷

明戴奎

題山農畫梅

元貢性之

王山農畫梅歌

明劉績二首

次韻題王山農墨梅

明文徵明

王山農畫梅

元唐肅三首

題畫梅和山農韻

明錢宰

胡侍郎所藏會稽王冕梅花圖

明僧來復

題王冕梅花揭篷圖

明僧溥洽

趙子固畫梅

元吳師道

題趙子固墨梅

元陳旅

題徐太守所畫推篷梅花圖

明李楨

題陳哲太守萬玉圖

明白圻

題宋院人畫著苔梅

明劉績

江西李君千能和墨及畫梅良齋許以三奇而

詩非所長也

宋樓鑰

贈畫梅王文顯

宋陸九淵

贈畫梅吳雪塢

宋謝枋得

贈黃竹邨老儒畫梅竹

元朱德潤

題梅石為王集虛尊師書紙屏上

元李孝光

題梅石卷贈蘇生

明王世貞

欽定四庫全書薈要卷一萬九千一百九十二

集部

御定歷代題畫詩類卷八十四

花卉類

王伯敬所藏趙昌梅花

宋蘇軾

南行渡關山沙水清練練行人已愁絕日暮集微
霰殷勤小梅花彷彿吳姬面暗香隨我去回首驚
千片至今開畫圖老眼淒欲泣幽懷不可寫歸夢
君家倩

趙昌折枝

元
袁
桷

瑤池朵朵玉精神
滴露研朱竟奪真
蛺蝶不知遮繡幕
飛來猶認故園春

題華光為曾公卷作水邊梅

宋
黃庭堅

梅蕊觸人意
冒寒開雪花
遙憐水風晚
片片點汀沙

觀華光長老仲仁墨梅

宋
鄒
浩

我從梅花海裏來
驚此兩枝堂上開
不由天降非地出

道人作麼生栽培無縫塔子通一線放光照醒陳根荻
玉蟾銀漢雨初霽半啟瓊室通瑤臺香雲漠漠護顏色
世眼欲覩誠難哉不如取酒共春醉一杯一杯復一杯

題華光墨梅二首

元王惲

滿溪明月影扶疎只在縑塵點雪膚展放畫圖還記得
孤山離落漲西湖

破墨能開雪裏芳道人花供老猶香移船要近華光住
笑殺涪公有底忙

題徽廟馬麟梅

元鄭東

龍樓鳳閣美人歌
賞盡瓊花碧玉柯
驛使去時渾浪折
江南春色已無多

題徽廟馬麟梅

元陳基

內家春色少人知
玉蕊冰蕤看轉疑
說與宮中小兒女
畫樓瓊瑄莫輕吹

宋徽宗畫半開梅

明張迪

上皇朝罷酒初酣
寫出梅花蕊半含
惆悵汴宮春去後

一枝流落到江南

題王元章梅

元
陳基

武陵溪上桃千樹亦有寒梅照水開
一種春風標格在
太平恩澤為栽培

王元章梅

元
鄭元祐

明月西湖上清光儼舊時
東風露消息香雪滿南枝

王元章梅

元
鄭元祐

孤山無復有梅花
寂寞咸平處
士家留得玉髯醉時筆

歲寒仍舊發枯槎

王元章白描梅

元鄭元祐

王郎筆底無纖塵只有萬斛江南春
疎花冷蕊禁不得珠明玉潤前
森陳珊瑚交柯撐鐵網金鉞鑠日
張龍鱗咸平處士西湖濱風雪滿
頭肌肉皺長歌短吟梅樹下聲
詩寫得梅花真王郎晚載剡溪雪
艤舟孤山一問津色香原本闕
塵盡奪取高揮大抹駭世人
舊時娟娟裏湖月清光長照無
疎親

題王元章梅

元 熊夢祥

紫禁春濃雪未消
年年香冷只飄飄
許身入畫酬清賞
不嫁東風過小橋

題王元章畫梅花

元 熊夢祥

水影晴光為寫神
當時已是失天真
一從殘角吹新曲
幾向寒溪覓故人
縞袂歸來猶有月
佩環飛去更無塵
莫言醉魄空籬落
信把和羹屬大臣

題王元章梅

元 張渥

照水疎花冰有暈橫牕瘦影玉無痕孤山月冷黃昏後
拄杖曾敲處士門

題王元章梅

元
丁復

三年不見王徵士一見梅花如見人風致山陰頻夢夜
雪晴江上又逢春毫端只作尋常寫意度真同造化神
聞道耶溪新買宅想栽千樹作比鄰

題王元章畫梅

元
楊維禎

舊時月色有誰歌拔劍王郎鬢已皤惆悵東風舊詞筆

南枝香少北枝多

題王元章梅

元

于立

老鶴歸來不受呼
野橋江樹雪模糊
西湖處處皆桃李
省識春風到畫圖

題王元章墨梅

元

釋子賢

我家繞屋梅花樹
況在清溪白石邊
雲霽月明疎影小
讀書猶記十年前

題王元章梅花圖

明

劉基

會稽老王拙且癡能畫梅花稱絕奇春牕走筆生古怪
中有窈窕傾城姿人生得閑真是好得閑不閑惟此老
布袍闌茸髮不梳一生只被梅花惱天生梅實可和羹
爾梅有花結不成世間花實總尤物不如圖畫終古無枯
榮

王元章墨梅

明
張羽

王郎志奇貌亦奇與世落落噤莫施一朝騎牛入都市
關吏不識誰何之歸來老作會稽客干戈歛起西南陲

青袍白馬風塵裏越州城邊戰不已雄襟自許魯仲連
一箭無成身已死世上空餘寫墨花只將名姓華光比
嗚呼人生有才不盡用古來埋沒皆如此

題王元章梅花和韻

明顧璘

墨池五夜飛玄霜素靈幻出梅花芳草堂忽爾見春色
氣序不得由勾芒空山慘凜層崖裂千枝萬枝綴瓊雪
水晶屏風踈影寒舉頭却見黃昏月江笛橫飄黃鶴韻
遷人莫報長沙信欲取寒芳寄遠書轉愁旅思催蓬鬢

簾外清香撲酒缸，千金莫惜日飛觴。
解道明珠交玉體，風流獨羨陳思王。
狐裘蒙茸不知冷，醉臥花前不須醒。
夢來直上羅浮巔，占却梅花千萬頃。

題王元章梅竹卷

次祝鳴和

明

顧璘

畫家妙品古亦稀，高人每號無聲詩。
淺夫拈筆率信意，豈解盤礴凝深思。
聊希形似即滿意，難與神化論等差。
子喬老仙烟霞骨，刷出心肝洗塵俗。
身化西湖一樹冰，氣吞湘岸千竿玉。
映縑姿態鬪纖穠，轉手枝柯分直曲。

山空自喜野人同歲寒敢謂吾曹獨補之墨梅稱絕倫
與可寫竹恒逼真今之畫圖兼二妙始信苦學能通神
草堂六月氣淒爽彷彿坐我清江濱白頭豈知老將至
對爾真足忘冬春憶昨青陽迴綠草橫斜桃李長安道
一夜飄風歷亂生可憐花葉紛顛倒塵世繁華有盛衰
朱門一閉無人掃與君開卷玩高標絕勝對客談虛藻

王元章倒枝梅畫

明
徐渭

皓態孤芳壓俗姿不堪復寫拂雲枝從來萬事嫌高格

莫怪梅花著地垂

王元章作墨梅并題長句書其後

明

陸完

月落參橫興已空
鑑湖清淺夜推篷
消磨不盡惟豪氣
猶在疎花淡墨中

題徐聖可知縣所藏楊補之二畫

宋

樓鑰

誰種疎籬古岸頭
推篷瞥見倍清幽
君看竹外一枝好
真有江南萬斛愁

梅花屢見筆如神
松竹寧知更逼真
百卉千花皆面友

歲寒祇見此三人

補之畫梅

元 程鉅夫

開卷見橫枝逃禪不可期忽思霜月夜獨坐小牕時

題楊補之梅卷

元 高儀父

籬根玉瘦兩三枝為繞吟香夜不歸安得密林千畝月
仰眠吹笛看花飛

題楊補之梅

元 劉詵

補之之梅不易作况乃藏自澹翁閣澹翁千載忠補之

一世雄元氣劈裂乾坤冬開卷灑然見二公孤山之月
羅浮風淡雲萬古吹不融黑埃黯慘翠羽失小牕澹瀟
重湖東塵心蕭蕭淡若水臥看青天露如洗

楊補之雪梅圖

明
吳寬

竹外斜枝凍雪乾楊翁風度亦酸寒扁舟穩繫吳山麓
須向石湖深處看

題柯敬仲梅

元
杜本

點點苔枝綴玉疎疎檀蕊凝香還記當年月色簫聲暗

度宮牆

題柯敬仲梅花竹石圖

元 郭翼

夜寒起坐看龍影金閣果
小殿東夢覺香吹梅子樹
玉文堂上月方中

題柯博士梅竹圖

元 郊 韶

文王宴罷奎章閣博士歸來
兩鬢絲寫得寒梅與脩竹
照人清影尚參差

柯丹邱梅竹

元 倪 瓚

竹裏梅花淡泊香映空流水斷人腸春風夜月無踪跡
化鶴誰教返故鄉

題柯丹邱梅竹

明
僧元璞

丹邱歸老江南日每話奎章瀑直時一夜春寒愁漠漠
白雲蒼雪共襟期

松雪墨梅

元
鄧文原

憶昔衝寒踏雪時百花零落願開遲如今收拾橫書卷
一任無情塞管吹

題松雪墨梅

元 錢惟善

小橋流水雪晴時
曾折幽芳寄所思
明月觀深春夢遠
玉堂仙客寫橫枝

趙子昂梅竹圖

明 解縉

王孫襟懷絕塵俗
迴若簞簞在空谷
又如仙子下羅浮
雪月梅花冰映玉
時將翰墨自寫真
心手相忘道機熟
流傳後世作者稀
丹青采繪工絕竒
寒聲夜讀暗香起
妙畫通神那得知

舜舉梅竹折枝

元 程鉅夫

吳興畫手早相知，粉墨淒涼歲月移。
惟有寒梅并翠竹，京華相對獨題詩。

題錢舜舉畫梅

元 戴子璋

故人相憶對南枝，寫寄無煩驛使持。
此日披圖空想像，猶疑月落酒醒時。

題錢舜舉所畫梅花卷

明 戴奎

雪溪畫師名早傳，畫梅不作鐵綫圈。
湖山入夢旣瀟灑，

粉繪落紙尤清妍
巴西故人玉堂老
別去幾年音問少
溪雲山月不堪持
一枝寫寄春風早
想當礧礧欲寫時
寓情筆底誰能知
心期不負歲寒意
貞潔要如冰雪姿
到今令人歎竒絕
我亦見之慚蹇拙
從誰交誼重金蘭
空慕廣平心似鐵

題山農畫梅

元
貢性之

大庾嶺頭春信早
十月梅開照清昊
曾騎官馬隴頭來
百里梅花夾馳道
夫君元是嶺南人
自言家近羅浮邨

種梅遶屋一萬樹玉為肌骨冰為魂得官遠向西湖住
喜與林逋作賓主夢回酒醒霜月寒又見梅花在牕戶
笑倩傍人為寫真相看如見嶺頭春一聲長笛月欲落
腸斷梅花身後身

王山農畫梅歌

二首

明
劉 績

玄冥凍律凝陰谷山魅幽幽弔僵木誰卷鮫機一尺烟
昆刀碎刻藍田玉博羅山人調小鳳瓦冷霜華不成夢
火熏金獸蘭氣溫鎖牕斜月淡幽痕

水仙騎龍歸海宮
玫瑰珠珮迎春風
霧澄天淨露嬌影
蕊粉染衣香更濃
鮫綃隔夢梨雲色
么鳳不鳴花脉脉
畫角吹殘十二樓
湖西曉月涵空白

次韻題王山農墨梅

明 文徵明

西湖老樹凌風霜
敷英奕奕先羣芳
貞姿不作兒女態
炯然冰玉生寒芒
窮寒襲人膚欲裂
幽人自詠孤山雪
至今秀句落人間
暗香浮動黃昏月
却恨無人續高韻
墨痕聊寄江南信
不關素質暗緇塵
剛愛鉛煤點新鬢

恍疑寒影照昏釭刻畫無鹽誰濫觴逃禪已遠嗣者寡
彷彿尚記山農王山農何處骨已冷展卷令人雙目醒
何因為喚玉妃魂極目清波湖萬頃

王山農畫梅

三首

元唐肅

春回却月觀樹樹總花開無數瑤臺鶴凌風欲下來
溪上雪消初溪水未動魚一枝寒日裏照見影踈踈
憶上寶瓶船西湖欲雪天一枝敲岸出低照酒尊前

題畫梅和山農韻

明錢宰

江南春來白雪爛落月橫參夜將半縞衣綽約如故人
踏颼梨雲敬老幹北風獵獵天正寒彷彿風節凭西闌
迺知山人竟不死夜煮白石青松間高情抗世無今昔
溪上梅花沒荒棘憶曾揮翰灑溪雲一枝寄與春消息
花前喚酒寫長歌花下呼兒掃落花若非揚州何遜宅
定是西湖處士家山人愛梅心獨苦笑爾豪吟玉堂樹
山巔水際日看花鳳詔鸞書招不去解衣盤礴兩袖垂
腕指所至皆天機南枝著花玉色起北枝凍壓玄霜飛

自從上苑成塵土無復當年舊歌舞源上桃花不記秦
九畹芳蘭已忘楚不如山人臥雲松破屋長在梅花東
傳家有子花作譜放手直欲先春風見花如見山人面
誰道人間無是公

胡侍郎所藏會稽王冕梅花圖

明僧來復

會稽王冕雙頰顰愛梅自號梅花仙興來寫遍羅浮雪
千樹脫巾大叫成花顛有時百金閑買東山屐有時一
壺獨酌西湖船暮校梅花譜朝誦梅花篇水邊籬落見

孤韻恍然悟得華光禪我昔識公蓬萊古城下臥雲草
閣秋瀟灑短衣迎客懶梳頭只把梅花索高價不數楊
補之每評湯叔雅筆精妙奪造化神坐使良工盡驚詫
平生放蕩禮法踈開口每欲談孫吳一日騎牛入燕市
嗔目怪殺黃髯胡地老天荒公已死留得清名傳畫史
南宮侍郎鐵石腸愛公梅花入骨髓示我萬玉圖繁花
爛無比香度禹陵風影落鏡湖水開圖看花良可吁咸
平樹老無遺株詩魂有些招不返高風誰起孤山逋

題王冕梅花揭篷圖

明僧溥洽

王郎寫梅如寫神，天機到手驚絕倫。
自言臨池得家法，開縑散作江南春。
酒酣豪叫呼霜斂，寶泓倒飲隄塵熏。
龍跳虎臥意捷出，縱橫錯莫迷芳塵。
繁花不消千樹雪，古苔蝕盡樛枝鐵。
縞衣綽約珮璫明，夜夜貞心照寒月。
嗟予落魄西湖濱，夢魂幾度入梨雲。
東風吹香趁流水，斷橋愁送波沄沄。
一杯不到孤山土，忽見王郎已千古。
還君此圖歌莫哀，原草青青隔烟雨。

趙子固畫梅

元
吳師道

千樹西湖浸碧漪
醉拈玉笛繞花吹
祇今無限淒涼意
留得春風雪一枝

題趙子固墨梅

元
陳旅

王孫朝罷景陽宮
畫舫湖頭寫雪風
一段寒香留不住
淒涼殘月角聲中

題徐太守所畫推蓬梅花圖

明
李楨

紛紛卉木凋零早
獨有江梅冬更好
天寒歲晏風泠泠

野渡無人流斷冰南枝爛漫北枝少恍如玉貌千娉婷
自憐隨月印沙影更愛臨崖近水形當塗太守今黃霸
名重華光補之亞酒酣自寫復自題餘子持縑終不畫
半開盛吐俱含態將飄乍落皆有情玲瓏輕霰簇鏤玉
蕩漾明珠疊碎瓊昨來盧君新卷裏寫得長梢最妍美
疎蕊凌寒似得春暗香撲鼻疑生紙世間畫手多凡流
惟數徐君筆最優不必掀篷掉飛雪觀圖何異在扁舟

題陳哲太守萬玉圖

明

白圻

玄冥一出百卉摧凍天裂地施寒威西湖老樹含春姿
鮮葩皎月爭光輝清香暗從風外來怯寒蜂蝶空疑猜
結實垂金飽霖雨調羹止渴非凡材孤山仙子詩興濃
厭看桃李嬌春風衝寒折雪攬芳潔豪吟意氣凌蒼空
十載論交良燕喜此日分襟隔湘水明歲仍期折一枝
寄與衡陽舊知己

題宋院人畫著苔梅

明
劉 績

濃露洗花骨苑空勞勞春綠罽疊仙帔粉姿疑笑人畫

屏眉幽夢夜苦香不歇楚竹裂鳳膺恨魄如懸玦

江西李君千能能和墨及畫梅良齋許以三奇而

詩非所長也

宋樓鏞

游藝無小大要皆知本原後人率意作終當媿前賢老
潘妙對膠法從玉局傳或假李心名空掃千鎗烟補之
貌梅花疎瘦仍清妍折枝映月影真態得之天李君信
雅尚二者將求全諸公競稱許試之乃誠然江西有詩
派皎皎俱成篇茲事未易窺屬和尚加鞭

贈畫梅王文顯

宋 陸九淵

子作寒梢已逼真不須向上更稱神
由來絕藝知音少只恐今人過古人

贈畫梅吳雪塢

宋 謝枋得

冷凝寒極雪漫漫天下無人知袁安起來門前問梅竹
吾友可以話歲寒歲寒心腸如鐵石不與萬物同摧殘
有時醉中畫梅竹洪鈞只在掌握間人生莫與天爭巧
上帝一見開笑顏八極俗物不足道千年陳人無可觀

誰能奈得此雪過春風去後終須還千紅萬紫爭爛漫
梅竹攜手隱空山皐陶庭堅不祀苦程嬰杵臼存孤難
豈無當門獨立者五更風雪不相干上帝慈仁須動念
醒來紅日上三竿

贈黃竹村老儒畫梅竹

元 朱德潤

烟水盱江渺丹陽度雪寒久憐梅淡泊先問竹平安夜
月清詩思春風彩筆端北來知己少歲暮欲彈冠

題梅石為王集虛尊師書紙屏上

元 李孝光

北風吹倒山三日雪塞門悵悵巖谷裏萬木命在根天
翁粲然笑洗出明月魂春如鼎中香已覺火力溫


題梅石卷贈蘇生

明
王世貞

君今幽興何所寄日坐磐石梅花傍一峰兩峰洞庭古
千樹萬樹羅浮香平泉莊畔酒初醒却月觀頭人欲狂
何似儂家新塢就不須遙羨白雲鄉



御定歷代題畫詩類卷八十四



總校官庶吉士臣侍朝
校對官庶吉士臣徐如澍
謄錄監生臣張駿